

## Naqqiut

Akissuteqaat 3. Oktober 2016-imeersoq taarserpaa

*(Imatut naqqiuteqartoqarpoq akissuteqaat allannguutissamik siunnersuummik ilalerlugu)*

**Sulisartut sunniuteqaqataaffiginngisaannik suliffeqarfiit aaqqiissutaagallartumik sivikitsumillu sulinermik unitsitsigallarnerini sulisartut suliffeqarfimminniit angerlartitaagallartarnerat pillugu aalajangersakkat Nunatsinni suliffeqarfinnut tamanut tunngatitaalernissaat qulakkeerniarlugu suliffeerunnermi ikiorsiissutit pillugit inatsisartut inatsisaata nr. 2, 15. maj 2014-imeersumi § 4-ap allannguutissaanik Naalackersuisut kingusinnerpaamik UPA2017-imi Inatsisartunut saqqummiusseqqullugit Inatsisartut aalajangiiffigisassaattut siunnersuut. Ilangullugu siunnersuutigineqarpoq inatsisini allani attuumasuni oqaasertatigut naqqiisoqassa-soq, qulakkeerniarlugu Suliffeqarfiit aaqqiissutaagallartumik sivikitsumillu sulinermik unitsitsigallarnerini sulisartut suliffeqarfimminniit angerlartitaagallartarnerat suliffeqarfinnut tamanut atuuttussanngortillugu.**

(Inatsisartunut ilaasortaq Suka K. Frederiksen, Siumut)

## Akissuteqaat

(Inuussutissarsiornermut, Suliffeqarnermut, Niuernermut Nunanullu Allanut Naalackersuisoq)

## Siullermeerinnineq

Naalackersuisut aalajangiiffigisassatut siunnersuut qujassutigaa.

Siunnersuuteqartup kissaatigaa § 4-p allanngortinneqarnissaa, imaalillugu nunami suliffinni nioqutissiornerup uninnera kisiat pissutigalugu sulisunik angerlartitsisarnermut pissutaassaaajunnaarsillugu, taamaattumillu oqaasertaliussassanik nutaanik siunnersuuteqartoqarluni, imaalillugu sulisunik angerlartitsisarnermut malittarisassat aamma atortuulersinneqaqqullugit sulineq unitsinneqarallaraangat aamma pilersaarutaasumik sulineq unitsinneqaraangat piffissami killilikkami. Ilutigisaanik siunnersuuteqartup kissaatigaa § 6-ip allanngortinneqarnissaa, taamalu inatsisip suliffeqarfinnut tamanut atortuulersinneqarnissaa, tamatumani aamma eqqiaanermik kiffartuussinermilu sulisunut, taamalu nunami nioqutissiorneq kisiat pineqarunnaarsillugu.

Naalackersuisut siunnersuut soqutiginarlutut nalilerpaat.

Inatsisissatut siunnersuut suliffeerunnerminni ikiorsiissutisartut amerleriarnerannik kinguneqartussaq ersarinnerusumik naatsorsuiffiusariaqarpoq, naatsorsorneqartariaqarmat inuit qassit inatsisissatut siunnersuummit pineqartumit attorneqassanersut, assersuutigalugu eqqiaanermi kiffartuussinermilu sulisuusut ullumikkut annertuumik amerlassuseqartut eqqarsaatigalugit. Misissuinissaq taanna inatsimmik nutarteraluni suliassamut ilanngullugu sularineqarsinnaavoq.

Kiisalu Naalackersuisut aamma sulissutigaa inatsisit pineqartut nutarterneqarnissaat 2017-imi ukiakkut ataatsiimiinnissap tungaanut, piginnaanngorsaasarnermik aqqiissuussineq, pisortanit ikiorsiissutinik aqqiissuussineq aamma siusinaartumik soraarnerussutisiaqartarnermik aqqiissuussinernut ataqatigiissaagassammata.

Suliaq annertuumik ataqatigiissaarinissamik Naalakkersuisuni piunasaqarfiuvoq, piffissap ilaanna suliffeqartartut, iluaqutaasunik suliffeqartartut aamma suliffiit illersugaasut ataqatigiissaarneqassammata.

Aningaasartuutit amerlerujussuarsinnaanissaat ilimanarsinnaammat, pingaaruteqarpoq nassuiaammi kommuunit suliffeqarfinnilu susassaqaqatigiit peqataatinneqarnissaat. Aammalu qanoq aningaasalersuisinnaaneq taamatut allannguinermi suliaqarnermi ilanngunneqarnissaa eqqarsaatersuutigisariaqarpoq.

Naalakkersuisut qulaani pineqartut tunngavigalugit allanguutissatut siunnersuuteqarniarpoq, tassani qulaajarneqassallutik aningaasatigut kingunerisassai naapertuuttumik misissorneqarnissaat anguniarlugu.

**“Naalakkersuisut kingusinnerpaamik UKA2017-imi suliffeerunnermi ikiorsiissutit pillugit inatsisartut inatsisaata nr. 2, 15. maj 2014-imeersumi § 4 aamma 6 allanngortinnerisa kingunerisinnaassaannik Inatsisartunut nassuiaammik saqqummiusseqqullugit peqquneqassasut, suliffeqarfiit aaqqiissutaagallartumik sivikitsumillu sulinermik unitsitsigallarnerini sulisartut suliffeqarfimminniit angerlartitaagallartarnerat suliffeqarfinnut tamanut atuuttussanngortillugu imaqartumik.”.**